

四庫全書

史部

欽定四庫全書

海塘錄卷五

內閣中書翟均廉撰

建築三

國朝

雍正十三年秋八月

命大學士江南河道總督嵇曾筠總理海塘事

九月修仁和海寧及海鹽等縣海塘

巡撫程元章疏言六月初二日夜颶風大作仁和  
海寧二縣共坍草塘三千九百五十一丈零盤頭  
一百二十四丈東西石塘五千六百五十六丈零  
沖卸大石塘面并裏外攔水石二百四十八塊土  
備塘坍卸涵洞一個小坍二十五丈仁錢二縣江  
塘間有坍卸多寡不同旋飭辦料搶修又仁海二  
縣海塘自雍正十三年正月起至六月初二日陸  
續坍埝草塘并盤頭雁翅共二千三百八十八丈

零石塘五百六十七丈零潮溝作壩三丈三尺今  
俱搶築完工第方秋汛宜緊為防護下部議行

冬十一月增築魚鱗石塘

大學士嵇曾筠疏稱六月內風大水湧舊塘坍卸  
雖分頭搶築不過堵禦一時現今塘身卑矮單薄  
背後盡係淪沅內外空虛實屬可虞杭嘉各府所  
恃以禦水患者惟一綫殘塘若不速為修治春潮  
踵至關係匪輕原議將舊塘坍卸處逐段改建石



塘今海潮直逼塘根衝刷萬難折去舊工改築惟有照歲修例速將舊塘上緊修築以固外面另於舊塘背後建築魚鱗石塘作重門外障更屬有備無患下部議行

葺舊塘

大學士嵇曾筠奏海寧浦兒兜至念里亭塘工悉係頂衝必須寬厚方可捍禦十一年奏請加高歷今兩載漸次塌卸宜於塘身裏面幫築土戩增卑

培薄一律高寬又查海寧塘工多屬活土浮沙前  
於塘身外面每歲補釘排椿修砌石塊三五層不  
等名曰坦水賴以擋浪護塘其如年久椿霉石塊  
淤卸近今又乏歲修殘圯殆盡當購辦大石將全  
塘坦水逐段修補而塘身石工更宜擇險修砌但  
不可用零星碎石堆垛須購運條塊大石將坍卸  
塘工分段改砌整齊方保無虞又查石工坍裂後  
多用柴鑲築補墊是以容易漏縱須仍用大石塊

鋪砌方固至於柴草工程宜加鑲高厚查海寧西  
翁家埠一帶塘根甚難釘樁砌石請購運柴料加  
鑲與附土塘身一律高平下部議行

南門外築魚鱗石塘

大學士嵇曾筠奏海寧縣南門外塘工五百餘丈  
貼近城垣當首險之地工程殘缺難資保障宜及  
時建築令於貼近舊塘須先築魚鱗石塘五百餘  
丈遴委幹員分段承辦預為指示庶可保固城池

也下部議行

十二月南岸製攻沙法

大學士嵇曾筠疏稱寧邑塘工之患雖在北岸而致患實由南岸長有沙灘綿亘百餘里又有沙嘴挑溜遂至江海水勢全向北趨請用借水攻沙之法在南岸沙洲用鐵器具梳挖陡岸俾沙岸根脚空虛乘冬季西北風多海潮往來使之自為衝刷隨勢坍塌奉

旨允行

立木石柴土章程

大學士嵇曾筠言塘工需用條石甚多非一山所能採辦山陰武康二縣距海寧就近蘓州洞庭等處路程較遠分別給山價水脚自七錢三厘至七錢七分三厘不等其修理坦水所需塊石募工匠於就近尖山開採又坦水需用椿木自一尺二寸起至一尺六寸循照舊例給發價值自上游之嚴衢

及下游之蘓常江寧廣為購辦可得椿木二十餘萬可以足用草塘需用鑲柴束於富陽分水建德桐廬四縣購辦向例責成沿塘殷戶經管收支既非經制人役又無額給工食守法者包賠頑詐者舞弊今將管柴殷戶盡行革除遴員查收沿塘造板房三十餘間以為柴廠又塘身帮築裹戩需土浩繁近塘不便開挖惟土塘塘河以北可以取土每方給價銀自一錢三分五厘至一錢八分不等

又裝運石料撥商竈船戶令於海潮大汛聽其載  
滴燒鹽小汛俱赴各山運石

大學士嵇曾筠奏停疏挖引河

曾筠疏言所開引河于中小疊外灘淡水埤安設  
河頭並非頂衝不能吸引江溜中段黃山廟一帶  
界於河莊禪機兩山之間北河頭地面較高江水  
豈能自下而上挽流注海而河尾又在茅草堰地  
方一派沮洳全無建瓴之勢潮來流沙漫入河中

潮退沙存日漸湮塞雖復疏通山水開挖南港一  
河又當北大壘之中挑溜仍歸海寧對面是不能  
引之使去而乃導之使來開挖以來計用過銀五  
萬五百五十兩隨濬隨淤迄無成效應請停止部  
議從之

暫停緩工以備修築

大學士嵇曾筠言堵塞尖山水口之工自上年九  
月迄今逾載雖經築定一百餘丈而未堵之處尚



寬七十餘丈潮汐往來溜勢日加湍激合龍甚是艱難零星拋擲塊石隨波漂淌日久無功現在修築舊塘坦水須用塊石而尖山採辦石料不能兩工兼顧請暫停堵塞石料俟修坦水使乘此冬季潮平及時修築而尖山水口一時不堵猶可留為後圖下部議行

是年分修補仁寧二邑草塘共用銀八千五百兩零搶修仁寧等縣風潮案內石草塘工

共用銀九萬七百九十餘兩歲修仁錢二縣江塘共用銀二千一百九十兩零

今上皇帝乾隆元年春正月春汛平穩

二月南北岸護沙日漲

大學士嵇曾筠以海寧一帶塘身坐當險要惟將新舊塘工次第修築一律高堅並於沿江沿海加詳修防疏通港汊而於南岸沙洲竭力挑砌將大溜日向南趨北岸自臻平穩現在東西兩塘漲沙

寬厚雖春潮浩瀚而塘隄鞏固永有安瀾之慶矣  
秋八月幫築沿塘土戢

大學士嵇曾筠言仁寧二邑沿塘土戢自寧邑念  
里亭迤西至浦兒兜止又自浦兒兜迤西至仁邑  
李家村止又自念里亭迤東至尖山石塘馬頭下  
坡往南止共長萬三千九百九丈工料銀八萬七  
千三百六十兩零修砌坦水自九里橋分工界牌  
起至浦兒兜大草盤頭止共長八千四百四十四

丈二尺內除三十四丈四尺改建盤頭毋庸修砌  
外餘長八千四百九丈八尺工料銀七萬五百三  
十三兩零擇險修砌石塘共長一千十二丈三尺  
五寸工料銀五萬八千二百四十六兩零雍正十  
三年十月開工乾隆元年五六月一律報竣

建築魚鱗石塘

大學士嵇曾筠言前議舊塘之背另度基趾改建  
石塘但需帑浩繁曠日持久如果水勢仍前危險

必須擇基另建今海寧東西兩塘水勢條順所議  
魚鱗大石塘應即於舊塘基址清槽釘樁如式甃  
砌仁寧二邑暨海寧南門外遶城險工共應改建  
魚鱗大石塘有六千餘丈下部議行

九月築海寧南門魚鱗石塘

大學士嵇曾筠奏寧邑南門外遶城魚鱗石塘五  
百五丈二尺約估工料銀八萬一千四十四兩五  
錢零下部議行

冬十二月造運石海船

大學士嵇曾筠以築塘所用之條塊石料必由海  
洋轉運但僱調商民船隻貽誤鹽務因請建造海  
船將原定水脚銀兩扣存除舵水工食等費外餘  
銀儘數存公塘工告竣仍可變價乃撥行五十隻  
每隻需工料銀二百六十八兩九錢二分零動支  
銀一萬三千四百四十六兩三錢零

是年分歲修仁寧二邑石草塘并加鑲盤頭

雁翅共銀四萬七千六百五十三兩零修築  
錢唐邑徐村橋等處江塘及加幫獨山等處  
土塘共銀九千九百二十二兩零

二年春三月編石草各塘字號

石草各塘冊姓向以某家東西起止開報然居民  
疎密不齊每多弊混雍正間監督汪漟張坦麟等  
議將各塘編立字號至是大學士嵇曾筠咨部將  
各塘照千文編立號次以二十丈為一號建豎碑

碣計仁和塘工長一千四百二十三丈五尺編七  
十二號海寧塘工長一萬二千七百九十四丈編  
六百四十號其餘海鹽等一應照例編立部覆准  
行

夏六月稽魚鱗石塘工費

大學士嵇曾筠疏稱浙省海塘自浦兒兜大石工  
尾起至尖山段塘頭止共應建築魚鱗大石塘五  
千九百三十丈二尺內自寧邑遶城石塘迤西地



勢稍為卑下應用條石一十七層計高一丈七尺  
內首險工一千四百二十丈一尺需工料銀二十  
五萬三千二百五十三兩九錢七分五厘零次險  
工九百八十三丈九尺需工料銀一十七萬五千  
七百六十兩六厘零自寧邑遶城石塘迤東地勢  
更為卑下應用條石一十八層計高一丈八尺內  
首險工二百九十一丈五尺需工料銀五萬二千  
九百六十二兩一錢九分四厘零次險工三千二

百三十四丈七尺需工料銀五十八萬七千七百七兩七錢一分七厘零今合先行分修大石塘二千九百七十四丈一尺其餘應修大石塘二千九百五十六丈一尺容次第興舉以垂久遠部覆准行

秋九月續幫李家村諸土餞

大學士嵇曾筠言續幫李家村沈家盤頭五里橋等處土餞共長四千六百一十丈五尺工料銀三

萬四千二百一十七兩零

閏九月改建海寧遶城坦水

大學士嵇曾筠疏言海寧縣南門外一帶塘隄所  
關綦重前請建築遶城魚鱗大石塘自西土備塘  
頭起至東土備塘頭止共長五百五丈二尺于本  
年五六月內陸續告竣但石塘又全賴坦水相為  
保護查雍正十二年冬底歲修塊石坦水潮汛往  
來易於淤卸今特外加護塘大條石坦水五百五

丈二尺其先承築石塘共工料銀八萬二千七百二十四兩七錢三分零今坦水共工料銀一萬五千五百九十二兩八錢三分零又幫築鎮海塔根圍牆並馬頭踏步一座工料銀五百二十九兩一錢零

是年搶修仁海二邑及鹽平等處土石草塘土餞銀三萬九千七百五十三兩零歲修仁錢二邑江塘共銀三千八百四兩零

三年歲修寧邑圖字等號石塘千四百二十  
五丈二尺改字號石塘並戴家石橋盤頭共  
三百七丈七尺五寸仁寧二邑藏字等號柴  
塘千五百六十二丈一寸又修築仁錢二邑  
江塘及建築海鹽邑堂字等號共銀三萬四  
千七百二兩零

四年春正月停止草塘歲修

撫臣盧焯以水勢日南漲沙綿亘數十里刮涵煎

鹽已成原野每年猶事歲修頗屬糜費似應將草塘歲修暫行停止

夏四月浦兒兜等處改建石工

撫臣盧焯言海寧濱臨大海向係土塘於潮汐衝頂處建築柴草盤頭計非經久迨乾隆二年改建石塘以資保障小墳前浦兒兜等處其時潮水尚激塘身猶藉草盤頭挑溜今水勢南遷沙漲日遠塘根之外皆成平陸則草盤已不必加鑲而於其後

身一例改建石塘統計一百六十八丈六尺下部  
議行

臣謹案草盤頭原設十座除陳文港一座已  
於查勘江海等事案內搶築石塘外尚有浦  
兒兜馬牧港戴家石橋秧田廟賣魚橋小墳  
前鄭九臯門前白牆門念里亭等九座至是  
盡改為石塘

冬十月接築尖山未堵工程

撫臣盧焯以尖山壩口為江海出入之處有未竣  
工程數十丈原因險不能堵塞故前大學士嵇曾  
筠奏請停止但前議暫停者以溜勢日加湍激合  
龍甚艱所用塊石兩工不能兼顧故請俟坦水工  
竣另行設法堵截原未嘗以尖山壩工可以竟置  
不議今水勢已平合龍似在此時查尖塔兩山相  
去二百丈已築壩工一百二十丈未竣者僅有八  
十丈從前原深九丈至一十二三丈不等今現在



中泓深一丈九尺近壩頭深一丈六尺近塔山深  
一丈三尺則寬處僅有三分之一深處僅有十分  
之一但以塊石裝入竹簍由淺至深可免飄流之  
患築高五丈即足以資捍禦矣下部議行

十二月濬備塘河

撫臣盧焯疏稱築塘全資石料向由海運直達工  
所今因沙漲石船不能擺塘艱於擡運不得不熟  
籌挽運之法查尖山迤東海鹽縣境內三澗塞高

姓石塘之外海船可以抵塘塘內舊有河形計長  
一千五百三十六丈可達海寧縣而寧邑之東西  
土備塘內外從前取土築塘已挖成河形自尖山  
以至天開河計長一萬四千三百七十餘丈即達  
仁和縣之范家木橋又自范家木橋至殊勝橋皆  
有舊河計長六千五百六十丈即達省城若循故  
道一律深通舟楫往來風濤無阻不特石料可免  
沙地損擡一應柴草木植皆可由內河轉運并利

於他務者不少乘今農隙分股開濬將見大工物料挽運便益商竈兵民永資利賴矣部議從之銷費九千二百一十二兩有奇

興築仁錢等邑江海塘隄

撫臣盧焯以仁錢等縣江海塘隄均為民生捍衛惟在先事圖維以期有備無患因請次第興修仁和縣自總管廟起至化支廟等處江塘七段共長七十六丈錢塘縣自流芳嶺起至獅子口張介凡

等門首江塘二十一段共長九百二十丈合兩縣  
需銀五萬九千七百六十六兩零下部議行

是年分歲搶修海寧及平湖等縣石塘共銀  
六千二百四十兩零內海寧韓家池等處柴  
塘三百三十二丈一尺尖山大盤頭四十八  
丈又濬塘河用銀九千二百一十二兩零

五年春二月續改東塘石工

撫臣盧焯稱海寧小墳前盤頭改建石工內讓出

錢氏祖墓應添修石塘二丈三尺工料銀四百二十九兩零部覆准行

夏閏六月續堵尖山功成

撫臣盧焯言續堵尖山水口於乾隆五年二月開工至閏六月工竣共堵工程八十丈需銀萬六千一十三兩零

秋九月預存歲修之備

撫臣盧焯奏言江海大溜往來叵測尖山填壩雖

有漲沙環護善後之計當先事預圖請將此項修築節省銀兩留存縣庫為久遠歲修計部覆准行改建緩修舊塘為魚鱗石塘

撫臣盧焯疏稱海寧縣塘內有潘介山屋前舊塘三十九丈五尺洪文舍西舊塘三十丈共六十九丈五尺現在椿朽石卸塘身埕墊亟須建築魚鱗石塘以資捍禦下部議行

續魚鱗塘取直開槽以便建砌

撫臣盧焯言寧邑東塘李富祥門前等處應建魚  
鱗石工一百一十二丈乃當日坍塘之所接修柴  
塘原坐灣曲必須取直開槽先幫土戩以便釘椿  
建砌應加幫築新土五千三百方八分增工料銀  
七百九十五兩零原估越壩毋庸建砌節省工料  
銀二百四十四兩部覆准行

冬十一月總督宗室德沛請柴塘改建石工

德沛疏稱仁寧二縣東西兩塘既已改建魚鱗大

石塘而寧邑之老鹽倉以西至仁邑之章家菴止  
一帶仍係柴塘未經改議乃於海龍洋等處最險  
要之地試築樣工二十丈以覘地勢請照所試之  
式改築石塘計長四千二百餘丈約工料銀九十  
餘萬兩部議准行尋以左都御史劉統勲奏改建  
不必過急乃緩興築

尖山壩工告成鑄鎮海鐵牛四座

鐵牛四座分置福寧宮前大塔山各一座新築石



壩中二座

是年分搶歲修仁寧二邑露結等號草塘四百八十丈又寧邑擇險搶修之石塘及緩修舊塘高止一丈四尺至一丈一二尺不等北新建魚鱗石塘形勢卑矮巡撫盧焯題請一律改建復於歲修案内題請外用條石加高內加頂土共長一千三十五丈八尺又於舊石塘加築子堰長一千三百五十二丈一尺

又修海鹽等土塘共銷銀四千七百三十一兩零

六年春三月總督宗室德沛復請老鹽倉柴塘改建石工

德沛奏稱寧邑之老鹽倉迤西至仁邑之章家巷一帶塘隄攸關七郡生民東西兩塘俱經改建石工不因漲沙停止獨草塘仍循其舊萬一風潮衝去護沙水勢由此直趨浸灌內地不但臨時搶堵

不及為患匪淺即使費盡周章恐所費更無算矣  
部議從之

冬十二月

命左都御史劉統勲查勘浙江海塘

統勲奏稱改建石工不必過急故有是

命

是年搶修仁寧二邑柴石塘一千一百九十  
五丈一尺及海鹽平湖二邑共銀五百七十

三兩零

七年春正月觀音堂等處建築竹簍石壩

總督那蘇圖奏言仁和縣章家菴起至海寧縣之  
華家街止約二千四百餘丈舊築柴塘外沙俱漲  
綿亘數里並無海潮衝頂無煩改建石塘華家街  
迤東至浦兒兜石塘交界一千八百餘丈已加鑲  
完固惟老鹽倉汛至東石塘界四五百丈地居頂  
衝修防宜加嚴密今擇其最險之觀音堂汛坐字

號老鹽倉汛伏字號又及字等號蓋字等號通計  
建築竹簍石壩四段又伏字等號一段用鳳尾順  
簍毗連接筍斜釘關攔順簍樁木部覆准行工竣  
報銷工料銀三千六十八兩零

三月定海塘効力員額

督臣德沛言海塘効力人員應照河工例按員缺  
多寡工程酌量需用人數著為定額下部議行  
夏四月改建議成

左都御史劉統勲言親履南北兩岸勘知柴塘改建石塘誠經久之圖但須寬以時日請將料物預期備辦俟水緩沙停可以施工乘機興築每年先以三百丈為率

定購辦搶塘柴薪實價

統勲奏稱搶修柴工需柴正殷柴價時值九分  
定例止准六分今次購辦柴薪商民觀望不前若不照時價給發誠恐貽誤要工請准照實價九分

報銷庶緊要工需辦運不致遲悞部議從之

六月製石簍以護塘基

督臣那蘇圖以老鹽倉汛至東石塘界最險處先間段排築石簍外捍潮汛內護塘基俟石簍根脚堅實再照原議建築石塘後於乾隆九年吏部尚書公訥親來浙勘視海塘言仁寧二邑柴塘外護沙寬廣實屬安穩護沙不必改建若慮護沙坍塌漲第將中小疊故道開濬俾潮水循規出入上下塘

俱可安堵經部議覆改建石塘事遂寢

是年分修築海寧邑金家木橋緩修工內舊  
石塘二十一丈銀一百八十二兩零又搶修  
觀音堂老鹽倉一帶柴塘共長七百二丈一  
尺并塞毛洞五十個共銀五千二百六十六  
兩零

九年春二月魚鱗大石塘工成

撫臣常安言海寧縣魚鱗大石塘於乾隆二年四



月初七日起工至八年六月初九日一律告竣共  
建築大石塘計長六千九十七丈六尺八寸加幫  
土戲計長一百一十二丈共銀一百一十二萬七  
千一百一十兩有零

臣謹案海寧大石塘自康熙五十年從大學

士朱軾請於浦兒兜至姚家堰等處建築一  
千三百四十丈工未竣巡撫屠沂奏稱老鹽  
倉迤西不能釘椿砌石改築草塘故惟老鹽

倉所築五百丈係石工雍正十一年內大臣  
海望總督李衛勘查塘工請將全塘一律改  
建大石塘逮十三年朱軾面奉

世宗憲皇帝上諭修建我

皇上御極

特命大學士嵇曾筠總理海塘事務乃請於寧邑  
南門外先築遶城大石塘五百五丈二尺乾  
隆元年八月奏建大石塘五千九百三十丈

二尺四年九月巡撫盧焯請將小墳前浦兒  
兜等處草盤頭九座一律改作石塘共增一  
百六十八丈六尺五年二月改建處讓出民  
塚添築石塘二丈三尺九月因緩修工內舊  
塘埕墊六十九丈五尺以柴塘改石工其逢  
灣取直節省處共七十二丈九尺二寸歷年  
題咨事件塘身丈尺工料價值各有增減原  
計應築石塘五千九百三十丈二尺實建六

千九十七丈六尺八寸原估工料銀一百六  
萬九千六百八十三兩零實銷一百一十二  
萬七千一百一十兩零

是年分加高海寧邑念里亭汎舊石塘一百  
五丈五尺尖山壩西舊石塘九十五丈鑲築  
浦兒兜舊石塘一丈五尺又加修西塘眉土  
三百三十九丈一尺加築大小山圩土堤七  
百七十四丈六尺及搶修海鹽平湖等處塘

銀共三千七百六十九兩零

十年分搶築海寧邑浦兒兜秧田廟柴盤頭  
二座又搶築將軍殿前柴塘一道長九丈殿  
東搶築柴盤頭一座搶築浦兒兜東塊石塘  
二丈五尺池家墳前塊石塘五丈五尺萬家  
街前石塘鋪釘排樁一十丈復建將軍殿前  
石塘九丈三尺合海鹽平湖等邑共銀五千  
五百三十六兩零又搶修海寧邑觀音堂老

鹽倉二汛柴塘共長八百五丈用銀八千九百八十七兩零

十二年春二月開中小疊工成

護巡撫臣唐綏祖言乾隆九年吏部尚書公訥親奏請將中小疊故道開濬深通時巡撫常安於蜀山一帶用切沙法相機疏刷至十一年春夏間蜀山已經落水潮汐漸向南趨北岸漲沙日廣但偃鳳山水未落河莊巖峰等山積沙尚厚而蜀山之

南原有舊時引水河道本年挑挖工長一千二百四十七丈五尺面寬三四五六丈底寬二三四丈深六七尺不等實用銀一千一百七十七兩零

十三年春正月加護塘土堰

大學士高斌言塘身雖固猶需善後之策倘潮頭風湧濺水上塘不可不慮但得塘後土堰攬護周匝則坡土不傷即無妨碍除八仙石起至章家巷老土塘四千七百餘丈另有外護土堰無須加築

今應自章家菴起至尖山脚下凡石柴草塘頂上  
後邊一律加築土堰底寬一丈二尺頂寬八尺高  
四尺共長一萬四千數百餘丈將舊有存塘土牛  
抵用外約銀六千六百餘兩係善後緩工限以二  
年為期於農隙之時陸續築成再自仁和邑江塘  
迤東至章家菴民築土堰量長六千二百餘丈原  
為八仙石迤東老土塘之外護惟是堰身高下不  
齊不足禦異常潮患必須統體加倍高厚與東西



兩頭塘身平接包裹老塘在內庶為無恐約需土方銀一萬二千八百餘兩連前項通塘加堰需銀一萬九千四百餘兩毋容動銷正帑並請於留備海塘工用項下支銷可也部議准行後以大學士訥親奏展限緩築

三月卹冲坍民戶

撫臣顧琮稱中小鹽引河故道於十二年十一月朔後江流直趨大溜南北兩岸水遠沙長塘隄鞏固

實可慶幸惟是沙地居民田被衝決雖已給遷徙之費而拆屋搬移不無拮据今擬查無力之戶給與口糧以資卒歲將銀照時價折給約需銀五百兩

夏四月議增滾壩及塘汛弁兵

大學士公訥親以江溜初向南行當防其仍復故道應設竹簍碎石滾壩以禦沖刷使江水仍復由壩漫流其蜀山至尖山一帶中有堰溝數道應酌

看形勢或於水口或於中段溝尾稍加堵禦以防  
直抵塘根至南岸一帶海塘因安瀾已久並未設  
有專司塘汛之員弁兵丁今江水既向南趨當派  
官兵駐宿不時查勘全岸塘工應移駐官兵相度  
沙之坍漲有無裨益並潮水長落情形一一熟知  
隨時調劑可免興修大工至前大學士高斌奏准  
將仁和縣江塘迤東至章家菴民築土堰動支舊  
存塘工銀兩加倍加厚此原係防禦異常潮患今

營造官兵房屋應需工料即移此項先為動用其  
修築民堰銀兩再展年限陸續修理

秋九月北塘等處堵禦潮溝

撫臣方觀承以大學士公訥親之奏奉

命查辦海塘因查河莊山後有沙南北橫亘如脊若設  
竹簍碎石滾壩以殺汛勢更屬有益又查三里橋  
塘外潮溝一道長二千二百丈口門寬一百八十  
丈應於口門進內設立竹簍碎石滾壩一道長四

十丈需銀五百五十一兩零又掇轉廟塘外潮溝一道長二千一百丈口門寬衍遠出大尖山外溝尾仍寬十五六丈深二三尺不等今於口門進內建築竹簍碎石滾壩一道以截內灌之水並可為尖山石壩外護其壩長二百三十丈內一百三十丈應築土壩其橫截溝身之一百丈先用柴墊高再排竹簍碎石滾壩共約銀一千一百四十餘兩又小尖山至大尖山石巖山二處逼近海濱宜建石

塘且潮水回溜趨東則大小山圩正當其衝應請  
於二處各建碎石塘一道與滾壩工程同時並舉  
約需工料銀二千八百二十餘兩隨經大學士會  
議准行

增撥防護海塘兵弁

撫臣方觀承以左營之念里亭右營之八仙石章  
家菴觀音堂靖海等處五汛弁兵按汛撤撥南塘  
其北塘除調撥外分守各汛操防力作若八仙石

章家菴二汛工程應歸於翁家埠汛經管觀音堂  
汛工程應歸老鹽倉汛經管靖海汛工程應歸于  
鎮海汛經管念里亭工程應歸於尖山汛經管均  
令汛弁按工巡防其抽撥南塘者自應就地建造  
衙署營堡以便棲止而一應統轄宜悉照北塘之  
例以昭畫一經大學士會議准行

是歲修築海寧竹簍石壩銷銀五百四十八  
兩零





海塘錄卷五

欽定四庫全書

海塘錄卷六

內閣中書程均廉撰

建築四

國朝

十五年秋海潮平

海水自乙丑歲以來大溜直趨中疊至是秋海波  
不揚臣民慶幸冬十二月撫臣永貴以秋汛海水

安瀾塘工穩固上聞

是歲修築仁錢二縣江塘銷銀一千四十八兩零

十六年春

上續承

祖武南巡江浙蒞錢塘江祭大禹陵

幸六和塔敬念

世宗憲皇帝奠安之德勒石紀事

向海潮直逼北岸仁和海寧二邑塘工頗以為患  
近年北岸漲沙潮汐南徙遂慶安瀾

上幸浙渡錢塘江是日風恬景明

皇情怡悅

親灑宸翰

幸六和塔諦察形勢敬念

世宗憲皇帝軫念海塘澤及萬世

御製鴻文勒石六和塔上永示無極

是歲修築錢塘葛家地江塘八丈九尺九寸  
銷銀三百四十八兩零仁和坍卸石塘一十  
二丈銷銀九百四十九兩錢塘坍卸江塘二  
十一丈四尺六寸銷銀九百一十六兩零海  
寧縣拆鑲南門外曹將軍殿前盤頭一座銷  
銀三百十四兩零錢邑三郎廟六和塔蜈蚣  
嶺等處坍卸石土塘三丈四尺銷銀一百三  
十四兩零

十七年歲修錢塘屠家墳江塘六丈三尺八寸銷銀二百五十七兩零又五雲山下江塘二十丈六尺四寸銷銀八百十九兩零搶緩修西塘戴家石橋石塘六段共長一百六十五丈七尺秧田廟柴盤頭一座外長十三丈九尺裏長九丈牽長十一丈四尺五寸共銷銀一千三百六十五兩零

十八年秋海潮平

自辛未春

駕幸浙江周察形勢嗣是海溜直趨中疊颶風不作居民遂慶安瀾十二月撫臣雅爾哈善以秋汛平穩塘工鞏固上聞

十九年夏四月督臣喀爾吉善請裁改海塘營官弁江海塘工向設兵備道統率守備二員千總四員把總八員外委十六員馬步守兵一千名分守防護塘工至是喀爾吉善以尖山石壩告成中小疊

引河暢流塘工平穩奏請裁汰道員塘工歸杭嘉  
湖道專管其原設員弁除改撥杭乍二營外尚餘  
千總二員把總四員外委八名均行裁汰原改設  
馬步兵二千名亦改撥杭乍二營三百名又改為  
堡夫四百名內以三百名守北岸一百名守南岸  
尚餘馬兵四十名步戰兵七十名守兵一百九十  
名均行裁汰

是歲分修錢邑橫港埠等處塘工十丈銷銀



七百三十四兩零

二十年歲修錢塘仇以介戶側萊重字號江塘六丈二尺四寸銷銀四百四十八兩零折修海寧城西曹殿東柴盤頭銷銀二百八十七兩零二十一年歲修錢塘孫家墳前遐字號江塘八丈二尺八寸銷銀六百五十兩零折修駒字號石塘六丈七尺二寸銷銀四百九十八兩零又陶字等號埧埭十三丈五丈

銷銀三百九兩零

二十二年春二月

上南巡閱海塘

幸觀潮樓視江水趨溜

命建海神廟

上以海塘為浙重務

特允臣民之請親臨閱視二月

幸八仙石諸塘至觀潮樓察江水趨南北之勢知大溜

直趨中疊兩岸沙灘自資捍禦降

旨建海神廟於城南觀潮樓明年廟成

御製碑文勒石

二十三年歲修錢塘流芳嶺至橫港埠石塘  
一百三丈九尺銷銀四十七兩零海寧曹殿  
前柴盤頭一座銷銀七百十三兩零

二十四年夏四月督臣楊應琚請酌復海塘營兵弁  
應琚疏稱中小疊之下因雷蜀二山漲沙連接水

勢仍致北趨海寧為全塘緊要之區搶修防護在  
在需人應請酌復千總一員把總二員外委三名  
馬兵二十名步戰六十名守兵一百零三名共一  
百八十三名海寧分設二汛每汛派撥把總一員  
外委一名尚餘千總一員外委一名駐扎寧城稽  
查調度所有舊設堡夫一百八十三名應請裁汰  
以抵酌復兵丁之數下部議行

閏六月備老鹽倉柴塘物料

撫臣莊有恭疏老鹽倉西華家街翁家埠等處現  
在江溜海潮均由北大疊水勢寬七八百餘丈不  
等雖塘外老沙尚未推圮然水勢靡常請先發銀  
給富建桐永四縣速運至工所以備應用下部議  
行

加築附塘土堰

撫臣莊有恭言海寧石塘近城一帶護沙日見沖  
卸石塘之內田廬鱗次倘遇風汛漫溢堪虞查該

處起止共長二千三百十六丈九尺請於現存埕  
墊土堰之上加高三尺寬二尺約估需銀九千四  
百七十兩零繞城土堰五百二十四丈一尺取土  
甚遠每方給銀一錢八分東西各堰取土稍近每  
方給銀一錢五分約需夫工銀一千四百八十三  
兩零下部議行

增築層石坦水

撫臣莊有恭奏言層石坦水原為保護塘根今水

勢北趨有需添建坦水處所亦應俟大汛過後籌  
議添建如舊有坦水或因年久椿根石歌亦應勘  
實補修下部議行

冬十月修海寧條石坦水

撫臣莊有恭疏江流海潮近由北大疊出入閏六  
月望汛潮水浩瀚由南折北以至海寧城東自九  
里橋西至曹殿盤頭漲沙盡刷水逼塘根七月大  
汛潑卸愈甚因於情形最險處委靳樹德等先築

條石坦水四十丈其餘應修應建條石坦水一千  
四百四十餘丈擇其地當險要不可緩待處工長  
四百三十五丈三丈委同知林文德等八員備築  
又逃城坦水沖溢殘缺亦應同時並修委李納璧  
等領辦以上共估零工料銀一萬八千二百二十  
兩零下部議行

二十五年夏五月修東西塘坦水及韓家池柴塘  
撫臣莊有恭疏海寧南門外東西兩塘護沙被刷



應於東塘吳宏曾經築緩修石塘起至西塘倪琯  
經築魚鱗石塘止築最要坦水七百七十七丈九  
尺三寸估需銀二萬三千六百六十二兩零又韓  
家池柴塘洄溜冲逼應自石塘頭東至大盤頭西  
拆底加鑲二百八十丈計銀七百二十九兩零令  
同知劉純煒等十員分段承修下部議行

六月海漲

命祀海神

時撫臣莊有恭以東西兩塘坦水工程分別緩急  
辦理及現在沙漲情形奏聞

上念切民依

命祭祀觀潮樓及海寧海神廟天后諸神

秋七月修築海寧南門外諸坦水

五月望汎潮損海寧南門外及石門遶城塘外二  
層坦水共二十七丈撫臣以年久椿朽請及時修  
理

是歲分修海寧秧田廟大石塘外修整盤頭  
一座銷銀七十四兩零折修韓家池柴塘二  
百八十丈銷銀一千七百九十一兩零海寧  
尖山疊砌竹簍五十丈又續砌竹簍三百六  
十丈銷銀三千二百十兩零

二十六年春二月修胡家兜坦水

撫臣莊有恭疏胡家兜迤東一帶塘身向因彼處  
尚有護沙是以列入次要工內今正月潮水逼塘

護沙被刷塘底呈露地當頂沖勢難緩悞內除兵力可修者計一百二十二丈三尺其餘一百二十三丈八尺急須委員改建條石坦水估工料銀四千五百九十二兩零下部議行

三月修建魚鱗石塘及坦水

撫臣莊有恭疏東塘小墳前等處條石塘三段前以塘身鞏固未議一律改建第該工自雍正八年建後已歷年久今外無護沙塘根淺狹應改建魚

鱗石塘十丈塘身拆出舊石修建條石坦水十丈  
又白牆門東應修築條塊石塘四丈增坦水十丈  
又念里亭盤頭西側條塊石塘二十五丈應行加  
高并增坦水二十五丈估需工銀三千八十九兩  
零下部議行

夏五月修馬牧港塘工坦水

撫臣莊有恭奏西塘馬牧港迤西一帶自三月望  
汛將護沙刷洗舊坦椿石多有殘缺除馬牧港地

方兩段石塘之中舊有柴盤頭一座就此修築盤頭以分水勢無須建築坦水其餘應修坦水自六十四段緩修石塘起間段至八十六段魚鱗石塘止共十一段計一百五十一丈七尺估需銀七千五百十兩零委梁世際等五員承築下部議行

冬十二月築秧田廟坦水

撫臣莊有恭奏西塘秧田廟迤西自春徂夏護沙刷盡應築次要坦水二百二十三丈八尺及另應

修建坦水一百五十一丈七尺又戴家石橋一帶  
大汛潮水仍復到塘底椿呈露內有舊無坦水之  
處應請建條石坦水四十六丈七尺委令同知高  
象震等僱築下部議行

修築韓家池柴塘

撫臣莊有恭疏韓家池柴塘二百二十丈因秋汛  
潮水頂沖外沙坍卸應請拆底加鑲估工料銀四  
千三百二十一兩零委平湖令劉純煒監辦下部

議行

是歲分修海寧城西馬牧港柴盤頭一座銷  
銀五百十兩零曹將軍殿盤頭一座銷銀七  
百二十兩零拆鑲老鹽倉塘一百丈銷銀一  
千八百三十三兩零續鑲柴塘七十丈銷銀  
一千二百八十三兩零又老鹽倉柴塘一百  
丈普兒兜盤頭一座銷銀二千二百二十七  
兩零又海寧修築尖山竹簍四百二十三个



銷銀三千九百二十八兩零又薛家壩修建  
魚鱗石塘坦水銷銀二百八十兩零

二十七年春三月

上幸江浙躬閱塘工

睿謀指示定築柴塘

柴塘下多活沙不能易石或云移內數十丈則可  
施工

皇上

特允臣民之請復舉省方之典三月初三日

鑾輿親歷海墘咨度經久之計因於城邊試下水椿始  
苦沙溢旋築以鉅碓所入不及寸許待椿下既深  
又苦沙散不齧木若柴塘向內數十丈其土似宜  
下椿可以即工然所在皆田廬塍澮

上心慮傷民力乃

命築柴塘定歲修增坦水又

命行在戶部及督撫詳擬加增柴價

親灑天章宣示臣庶

諭旨勒諸貞珉以垂不朽

恭紀  
首卷

上親幸海神廟祀之

時

駕幸尖山守塘者以漲沙聞

上以海波不揚塘工鞏固皆恃

神佑乃

親祀海神廟廟有

世宗御製碑文在焉

上因御製閱海塘記以誌閱塘資度之事勒之碑陰又幸觀音潮神二廟及安國寺並

賜聯額及

御製詩

恭紀  
首卷是夜

駐蹕前 予告大學士臣陳元龍園

賜名曰安瀾

命御前大臣誌石簍以驗沙漲

撫臣言竹簍貯石下護壩基數日來沙漲掩簍四尺許

上命都統努三額駙福隆安立標於石簍之上以驗增長努三等回奏云十日以來沙漲至三尺餘土人以為

神佑

秋九月改建坦水

撫臣莊有恭奏東西兩塘應修應建坦水工程一

千六百六十餘丈先已分別緩急奏請次第興修  
內除最要坦工七百七十七丈次要坦工一百七  
十丈五尺均於乾隆二十五六等年先後趕辦完  
固其餘七百十餘丈內有一百三十丈或底沙增  
刷塘身露高十五六層或舊有椿石殘缺又迤西  
另有搶修石塘二十一丈五尺塘身亦露高十五  
六層舊存塊石無幾急應一併估辦又念里亭白  
牆門兩處舊有盤頭二座積被汕刷應行改建石

坦三十一丈共計應築坦水一百八十三丈二尺  
估需銀八千三百四十五兩委同知劉純煒等督  
辦下部議行

冬十月改築四里橋魚鱗石塘并華岳廟等處石塘  
盤頭坦水

撫臣莊有恭疏海寧縣東西兩塘於七月初七日猝  
被風潮將緩修石塘間段坍卸并各盤頭亦遭淤  
損應行改建四里橋等處魚鱗石塘五段一百四

十三丈七尺又華岳廟東須拆築條塊石塘五丈  
又陳文港東西盤頭并秧田廟盤頭三座改建坦  
水共長六十丈一尺又陳文港東緩修與搶修石  
塘兩不相接之處添築裏頭一道原議築長三丈  
五尺緣搶修石塘在內緩修石塘在外中間相去  
三丈五尺若就空處平築則突出之緩修石塘未  
免倍受潮沖應添築一丈三尺以順潮溜共長四  
丈八尺以上各工共估需銀二萬七千二百三十



九兩零委杭州府知府張鎮等監辦下部議行

是歲接築海寧觀音堂迤西簷坦四百丈需  
銀九千四百三十九兩零又置橫簷一百六  
十七箇需銀五百九十六兩零搶修老鹽倉  
柴塘一百四十八丈零銀一千四百七兩零  
東塘曹殿東盤頭一座需銀二百四十二兩  
零

二十八年春正月議定搶修塘工

撫臣熊學鵬疏乾隆二十七年七月初七日風潮  
潑損東西兩塘東塘潘重庚承築遶城石塘起至  
吳宏曾承修緩工止內潑卸一千四十七丈一尺  
又曹將軍殿東柴盤頭一座西塘自老鹽倉石塘  
頭起迤西至鐵牛西止內潑卸一百四十八丈四  
尺又普兒兜馬牧港柴盤頭各一座共估銀二千  
三百三十五兩零

夏六月建念里亭坦水

撫臣熊學鵬奏言海寧城東念里亭地方魚鱗石塘十六丈其塘外原係舊廢盤頭未建坦水現在潮溜冲刷以致塘身見露十六七層不等應請修建坦水以護塘身估銀九百五十一兩零下部議行

秋九月念里亭諸處改建魚鱗石塘

撫臣熊學鵬疏稱海寧東塘念里亭汛內小墳前第六十六段西首緩修條塊石塘三十五丈五尺

東首緩修石塘十三丈二尺歷年久遠底椿霉爛  
難資捍禦又西塘戴家石橋汛內第四十七段緩  
修塊石塘二十九丈五尺塘身臃凸應請於小墳  
前改建魚鱗石塘四十八丈七尺戴家汛內改建  
魚鱗石塘二十九丈五尺并修補坦水估銀一萬  
三千九百八十五兩零下部議行

冬十二月

上允臣民籲請降

旨於乙酉歲再巡江浙閱視海塘

督臣楊廷璋撫臣莊有恭以臣民望幸之忱請

上四巡江浙閱視塘工

上以海塘漲沙雖有起機大溜尚未趨赴中疊新修柴

石塘亦當

親閱其工以便隨時指示

頒詔俯允所請於乙酉之春恭奉

聖母皇太后慈輿重幸江浙

修築老鹽倉等柴塘

撫臣熊學鵬疏稱老鹽倉至觀音堂折築柴塘六百七十五丈用銀一萬八千二百四十二兩零令杭州府知府劉純煒承辦下部議行

接築翁家汛曹殿東柴塘

撫臣熊學鵬題稱海寧縣老鹽倉迤西至翁汛境內鑲築柴塘一千三百四十五丈並已完竣惟翁汛迤西塘外護沙被潮沖激舊椿霉朽應於新工

之西曹殿東拆築柴塘一百丈估需工料銀二千七百二十七兩下部議行

是歲接築觀音堂迤西柴塘三百丈估銀八千一百八十三兩零接築翁汛柴塘一百丈估銀二千七百二十七兩零曹殿東接築柴塘一百丈估銀二千七百二十七兩零分修錢塘江塘人始等五號長十四丈又大朱橋踏步一座長一丈六尺銷銀三百四十三兩

零

二十九年春二月定歲修銀數

撫臣熊學鵬疏西塘老鹽倉石塘頭起至觀音堂  
止柴塘長九百四十五丈前因水逼塘根於二十  
六年先行鑲修已竣工長二百七十丈其餘六百  
七十五丈亦於二十七年九月初七日止一律完  
竣第工竣以來二十八年已歷春霽伏秋大汛潮  
溜往來柴土蹲姓應行加鑲平整今循例於霜降



後舉行歲修估需銀五千五百八兩零

置老鹽倉護塘竹簍

撫臣熊學鵬疏老鹽倉一帶塘外安設護塘竹簍  
工長九百四十五丈隨時添設用過銀二萬二千  
六百四十七兩零石門令夏廣文等督辦

修築普兒兜坦水


撫臣熊學鵬疏稱西塘普兒兜大石塘外建築坦  
水四百六十丈又大隆號舍前工長一十丈用過

銀二萬五千八百九十兩零

夏四月築念里亭諸處坦水

撫臣熊學鵬疏海寧東西兩塘念里亭戴家石橋  
二汛內前同知林緒光監築魚鱗石塘共工長一  
百七十七丈七尺塘外從前原有護沙未建坦水  
近因護沙漸刷地當沖要塘身已露高十五六層  
不等亟應建築坦水以護塘根估應需工料銀五  
千九百六十七兩零委令赫名額等六員分段監

辨



海塘錄卷六

欽定四庫全書

史部  
海塘錄卷八

詳校官監察御史臣王爾烈

刑部郎中臣許兆椿覆勘

總校官進士臣朱鈴

校對官編修臣盧遂

謄錄監生臣紀慶綵

欽定四庫全書

海塘錄卷七

內閣中書翟均廉撰

名勝一

廟山 咸淳臨安志在錢塘縣去城五十里突出

江心潮勢至此方殺

詩

主祠祖廟山道中 蕭蕭疎雨點孤篷舟子招

呼語順風小麥青青春怯半一犁江上看田翁  
揚萬里曉泊舟廟山平水長先曉無風也自  
濤烟昏山易遠岼澗樹難高去雁鳴相報游魚  
冷揔逃輕寒客可忍清眺得辭勞

大湖山 萬厯錢塘縣志茱萸尖之支東南行為  
大湖山山頂平廣五十六畝可耕有洞曰錢王洞  
洞門二皆大許中廣二三畝不見日泉乳所結有  
長一二丈者紆回二十餘洞底有小窟窟下大潭

深不可測取石投之聲如洪鐘山下有風洞立夏  
風生立秋風止有水洞水極清澈咸淳臨安志楊  
村慈嚴院舊名恩德有洞極大流水不竭頂上又  
一洞名風洞中多石子紅點如丹持出即隱置於  
內如故江月松風集洞在定山南葛洪常煉丹於  
此東坡與李節推唱和見集中方里英許郢州林  
和靖皆有詩

詩

白居易余以長慶二年冬十月到杭州明年秋  
九月始與范陽盧賁汝南周元範蘭陵蕭悅清  
河崔求東萊劉方興同遊恩德寺泉洞竹石藉  
甚久矣茲目擊果愜心期因自嗟云到郡周歲  
方來入寺半日復去俯視朱綬仰睇白雲有愧  
於心遂留絕句 雲水埋藏恩德洞簪裾束縛  
使君身暫來不宿歸州去應被山呼作俗人  
林逋風水洞 平昔嘗聞風水洞重山複水去



無窮因緣偶入雲泉路林下先聞接客鐘

趙抃風水洞 風穴有聲連水洞聽風觀水暫

閒身杭州未入從容甚且與南山作主人

蘇軾往富陽新城李節推先行三日留風水洞

見待 春山磔磔鳴春禽此間不可無我吟路

長漫漫傍江浦此間不可無君語金鯽池邊不

見君追君直過定山村路人皆言君未遑騎馬

少年清且婉風巖水穴舊聞名只隔山溪夜不

行溪橋曉溜浮梅萼知君繫馬巖花落出城三日尚逡遲妻孥恠罵歸何時世上小兒誇疾走如君相待今安有

蘇軾和李節推二首 山前乳水洗塵凡山下清風舞檜杉細細龍鱗鋪亂石團團羊角轉空岩馮夷窟宅非楹棟禦寇車輿謝轡銜世事漸艱吾欲去永隨二子脫譏讒 風轉鳴空穴泉幽瀉石門虛心聞地籟妄意覓桃源過客詩難

好居僧語不繁歸瓶得冰雪清冷慰文園

蘇轍和子瞻風水洞 風送江湖滿洞天洞

門可聽入無緣土囊鬱怒聲初散石齒聳牙勢  
未前樂奏洞庭真跌宕歌傳帝所亦清便何人  
隱几觀遺韻重使顏成問嗒然

張無盡風水洞 巔頭松竹自生寒雨穴茫茫  
徹鬼闕風竊虎威時弄草泉欺龍睡故離山不  
嫌浙滙驚塵耳聊挹清泠洗病顏牕外月高相

簾冷更無閒夢到人間

司馬才仲風水洞 藤梢幕荒寒 薜花陰空清  
窈窕石竇中 兩耳風雨并 初聞聲蕭騷 活火急  
銅瓶再聽 逗餘響 習習起寒汀 我疑此山空 石  
脚連滄溟 中有蛟龍蟄 鼻息隱雷霆 又疑仙翁  
却丹竈 留岩扃 至今爐鼎中 水火不曾停 山前老比  
邱 霜眉眼如螢 能傳古者語 濯我耳 聽醒便欲謝  
塵凡 脫鞵隨真靈

元居中風水洞 二洞標奇古連岩葺宇新涼  
生清桂曉暖漲碧桃春閒擁東方騎來尋北隴  
人破雲拖蠟屐琢句掃霜篋譚劇頻飛屑歌長  
自落塵為探瓊巖勝不記玉觴巡下客慚毛穎  
高筵飲德醇追峯到峯頂疑化九霄身

元居中風水洞上祖無擇 洞蔽深雲遠俗塵  
山中曾未識朱輪自從白傳來遊後五百年間  
又二人

張先和韻 水色風光近使君  
泥塵輕雨逐車輪  
暫來不宿宜無恨  
多少行春不到人

許遵風水洞 水洞連風洞  
精藍兩洞前  
山高易藏日  
樹老不知年  
板有華宗刻  
名留少傅篇  
烟波門外境  
寂寞變桑田

范仲淹風水洞 神仙一去幾千年  
自遣秦人不得還  
春盡桃花無處覓  
空餘流水到人間

許元祐風水洞 野寺依山立  
松橋避石斜  
壞

梁飛白蟻枯木掛元蛇道路悲蓬轉功名惜髮  
華聊將洞中水試洗眼前花

錢惟善風水二洞 空穴風來自吸噓垂岩出  
水广渠渠天門此際通闔闔海眼何年泄尾閭  
隱者難招應化鶴飛仙可挾更乘魚留題太守  
懷蘓白好事今無五馬車

瑤山 咸淳臨安志在錢塘縣去城五十里近廟  
山在楊村有慈嚴院萬歷錢塘縣志石龍之支東

南行為壘山四圍皆石玲瓏秀巧有仙人洞洞門  
石闕一石從空駕其上洞內空明有石鼓傍有小  
窟竒石空洞

浮山 神州古史考在府城西南四十里高二十  
丈峙於江中與漁浦諸山相望潮水迴伏激射若  
神馮焉咸淳臨安志在錢塘縣東坡守杭日開河  
奏云潮水自海門來勢若雷霆而浮山峙於江中  
與漁浦諸山相望犬牙錯入以亂潮水洄洑激射



其怒百倍沙磧轉移狀若神鬼雖舟師漁人不能  
前知其淺深坐視舟船覆溺無如之何今號浮山  
最險處江月松風集浮嶼山在定山側浮江磐石  
有潭聚魚玲瓏可觀潮出海門中分為兩派東派  
沿城岸向富春西派直抵慈山而回諺謂之回頭  
浪

詩

錢惟善浮峙藏魚潭色空澄島影孤潛鱗時

出送天吳浪吞泗磬秋浮玉月照驪龍夜吐珠  
萬騎西來疑灩澦扁舟東去想陶朱沒淵每笑  
窮魚者何處烟波覓釣徒

定山 咸淳臨安志在錢塘江上高七十五丈周  
迴七里一百二步太平寰宇記定山突出浙江數  
百丈西湖遊覽志一名獅子山文選注吳郡緣海  
四縣記錢塘西南五十里有定山去富春又七十  
里橫出江中波濤迅邁以避山難水經注錢塘縣

東有定已

越作包

諸山皆西臨浙江水流於兩山之

間江水急迅兼濤水晝夜再來至二月八月最高  
峨峨二丈餘吳越春秋以為子胥文種之神也上  
有可避濤處行者賴之云是海神婦家郡國志江  
濤至是輒抑聲過此則雷吼霆怒江月松風集謝  
靈運富春渚詩有曰定山杳雲霧即此也神州古  
史考在府城西南四十里江迴漁浦之潭山枕赤  
亭之野謝康樂之所曾賦沈隱侯之所嘗遊蓋波

濤衝激之地行旅棲遲之所也

詩

沈休文早發定山 夙齡愛遠壑晚蒞見奇山  
標峯綵虹外置嶼白雲間傾壁忽斜豎絕頂復  
孤圓歸海流漫漫出浦水濺濺野棠開未落山  
櫻發欲然忘歸屬蘭杜懷祿寄芳荃眷言採三  
秀徘徊望九仙

錢惟善定山曉行 前峯月吐五更初空翠沾

衣積雨餘溪火夜明經畧釣澗雲秋重負蘧藤  
篠林虎與人爭關茅屋鷄催客趣虛不似關山  
行役者勞勞服賈遠牽車

臣

謹案錢惟善有定山十咏曰定山曉行曰朱  
梁夜泊曰六和觀月曰五雲賞雪曰龍門曉  
雨曰漁浦春潮曰風水二洞曰鳳凰雙髻曰  
浮峙藏魚曰浙江耀武

殷雲霄夜登定山 朝泛桐江水夜躡定山石

延蘿踞虎豹，噓波動潮汐。俯闕馮夷宮，疑入羽人宅。林靜江有聲，雲昏岸無迹。懷哉坐哀聽，戚矣闕遠覲。風勢依峰峻，月色連江白。飛鴻鳴遠浦，潛蛟舞深澤。飄飄千里身，脈脈獨遊客。乘桴嗟有志，棲岩悲失策。薄宦竟何有，幽期誰與適。覺迷道有獲，含欲情無逆。蒼言咏白駒，聊以慰今夕。

排山 咸淳臨安志：排山在錢塘縣定山之北鄉。

排山嶺在定山南而鄉屬仁和縣

徐村嶺 夢梁錄俗名薑擦子嶺在錢塘定山北鄉  
龍門山 咸淳臨安志在錢塘縣西溪之欽賢  
鄉地高峻上有龍池寺江月松風集龍門在定山  
西兩峰壁立有龍潭能興雲雨旱禱之輒應

詩

錢惟善龍門曉雨 神剎峭壁聳雙扉雨挾腥  
風下翠微黑入太陰迷爽氣白翻叢薄散朝霏

螺橫雜樹應藏景蛟吐癡雲未霽威回首他山  
新似沐登樓時攬女羅衣

五雲山 咸淳臨安志在錢塘縣約高百丈周迴

二十五里

陳善志作高千丈周四十五里

神州古史考在府治西

南二十里宏祿雲棲寺記山有五色雲故名已而

五雲飛集山塢中因號雲棲塢西湖遊覽志五峰

森列盤曲而上凡七十二灣俯視南北峰若雙髻

萬歷錢塘縣志江上之山為天門山丈南行者曰



五雲高百丈俯瞰大江之三浙當其前其西北邐  
上為雲棲塢溪水經朱橋入江千萬歷杭州府志  
山半有伏虎亭梯以石城以便往來江月松風集  
五雲山在定山北梁普覺禪師道場宋故事每歲  
臘前土僧必奉雪表進黎明城中霰猶未集蓋其  
地特高寒云

詩

錢惟善五雲賞雪 獻瑞名山自昔聞化人臺

殿雜金銀樹靈尚吐三花秀雲凍全消五色文  
鳥絕空江知棹泊鹿迷深逕待樵分興來更上  
高寒處此境應無蕭使君

錢惟善登五雲山 善覺遺衣久不傳五雲故  
色尚蒼然斷崖蘿薜三千丈喬木風霜四百年  
龍井雨深泉獨響漁村潮上月初圓寶坊金碧  
紅塵聚何似茲山更絕緣

余知閣五雲山三首 幾年魂繞浙城西十里

荷花漾錦陂踏遍兩峰三竺路又隨青嶂入雲  
棲 千里旗旗擁六飛投簪欲上釣魚磯無端  
忽被閒雲引迴耀峰前掩竹扉 洛邑名園歌  
舞沈亂鴉啼破幾黃昏何人學得香山老千載  
精廬有梵音

林景初金日新曾宿五雲山 山氣清如沐  
林扉夜不扃月明苔徑白林暗水螢青幽蔥  
臨風辨孤泉過石聽何當凌絕頂萬里極滄

溟

許穀登五雲山 名山高擁五雲層危磴重重  
躡屐登西望諸天應咫尺東來疊嶂總邱陵海  
門遙指三山樹梵殿常懸七寶燈便掃蒼苔題  
短句乾坤高覽記吾曾

沈嘉則五雲山 偶凌吳岫恍蓬壺直駕長風  
上帝都石割鴻濛秋色重路盤霄漢鳥飛無白  
雲東盡天連海青嶂西來日滿湖信有胡麻堪

飯客荷鋤於此作潛夫

秦望山 咸淳臨安志兩朝國史志錢塘有秦望山舊志云在錢塘縣舊志之南一十二里一百步

高一百六十丈周迴一百步晏元獻公輿地志秦

始皇東遊登此山欲渡會稽

史記始皇至錢塘臨浙江見水波之急不

能渡乃西北從狹中渡

後唐同光中錢氏於秦望山建上清

宮有巨石二十餘株自然成行名曰金洞門近東南有羅剎石吳越史唐咸亨中望氣者言錢塘有

王氣命侍御史許渾等賞壁瘞此

詩

薛據登秦望山 南登秦望山目極大海空朝  
陽半蕩漾晃朗天水紅溪壑爭噴薄江湖遞交  
通而多漁商客不悟歲月窮振緡迎早潮弭櫂  
候遠風余本萍泛者乘流任西東茫茫天際帆  
棲泊何時同將尋會稽迹從此訪任公

馬湘登杭州秦望山 太乙初分何處尋空留

歷數變人心九天日月移朝暮萬里山川換古  
今風動水光吞遠嶠雨添嵐氣泣高林秦皇誤  
作驅山計滄海茫茫轉更深

月輪山 咸淳臨安志在龍山左右形圓如月故  
名萬歷錢塘縣志山峙江右江月松風集在定山  
北其山名月輪有寺臨江遇月尤佳舊傳張君房  
曾宿寺月中桂子下塔上咀之無味中有金魚

池

詩

余弼月輪山慧悟禪師上方 孤峯牢落幾何  
年臺殿於今半挿天已是精藍誇絕徼更將寶  
塔在危巔烟霞色任陰晴變鐘磬聲隨上下傳  
珍重老僧無別境一生幽趣只山川

白塔嶺 萬厯錢塘縣志嶺峙江上仲秋十八日  
邑令酹江於此

詩



范仲淹白塔駐軒亭 登臨江上寺遷客特依

依遠水欲無際孤舟曾未歸前峰藏好處幽鷺  
得閒飛多少天真趣遙心結翠微

錢惟善晚雨過白塔 宋宮傳是唐朝寺白塔

崔嵬寢殿前夏雨染成千樹綠暮嵐散作一江  
烟蒼苔門外金鋪暗細柳營中畫角傳寂寞  
蘆宮井畔野人拾得舊金鈿

龍山 咸淳臨安志在嘉會門外去城十里一名

卧龍山萬厯錢塘縣志育王山俗稱鍋子山去城

十里而近壁立尖聳特異諸山有臺曰登雲錢王建鄧

天地之所也有洞曰靈化在臺側武肅王勒壁存

曰陽明有池曰洗馬曰鴻鴈有天龍寺唐天龍和尚開山

有勲賢祠舊名天真精舍薛侃等建以祀王守仁玉津園宋建講宴射禮之所

梅花巖宋時易安齋有梅巖前有龜疇田宋郊壇也明邑令鼎心湯

建太極亭即其處錢塘縣志育王山即龍山舊志作龍華

山誤神州古史考龍山一名卧龍山又名龍華山

與上下石龍相接天目分支沿江而東結撰於此  
蜿蜒若遊龍然郭璞所謂龍飛鳳舞者即此山腰  
為天真寺亦稱天真山山巔有玉皇廟俗稱玉皇  
山亦云育王山蓋龍山者錢氏郊天處釋老之談  
或云阿育王或云玉皇皆祀天帝遺意也

詩

蘇軾曾元恕遊龍山呂穆仲不至 青春不覺  
老朱顏彊半消磨簿領間愁客倦吟花似酒佳

人休唱日銜山共知寒食明朝過且赴僧牕半  
日閒命駕呂安邀不至浴沂曾點暮方還

王銍九月二十七日與客遊龍山 野服芒屨

步步同天寒酒薄客情濃身如萍水同千里  
路入烟蘿更幾重滄海清江共今古黃花紅  
葉雜秋冬暝雲自與千峰合送我歸鞍寺寺  
鐘

余士吉題天龍寺 龍飛鳳舞兩峰回旺氣纔

銷梵宇開卓錫地  
侵迎輦地雨花臺  
近拜郊臺草分綠色  
緣城去風送江聲  
入寺來三百年來  
如昨日老禪猶說  
舊蓬萊

朱德潤拜郊臺晚渡  
風颺松花落澗濱  
荻芽洲渚水鱗鱗  
莫教行到崇臺上  
忘却山前喚渡人

周密郊丘紀事二首  
黃道官羅瑞腦香  
袞龍升降佩鏘鏘  
大安輦奏乾安曲  
萬點明星簇紫

皇 高騎雲從簇錦圍內官排立馬如飛九重  
閭闔開清曉太母登樓望駕歸

徐清叟梅巖二首 千年奎畫照蒼霞酬唱官  
梅竹外斜恭想皇靈天闕上歸時猶惜洛陽花  
偶因紀事訪丹霞寺古山深石徑斜衝冷細  
尋梅信息枝頭喜見狀元花

洪邁車駕幸玉津園命下大雨已而天宇豁然  
進詩歌咏其實 五雲猶自雨如麻無限都人

仰翠華翻手作雲方悵望舉頭見日共驚嗟天  
公的有施生妙帝力堪同造物誇上苑春光無  
盡藏可須羯鼓更催花

曹勛從駕玉津園二首 天子行春御六龍五

雲回煖泛晴風和鸞寶苑梅花路賸有香傳玉  
座中 花梢糝糝動朱欄萱草侵苔雪已乾行  
闌風光隨處樂春臺人物不知寒

王守仁西安雨中寄德洪汝中并示書院諸生

幾度西安道江聲暮雨時機闕鷗鳥破踪跡水  
雲疑仗鉞非吾事傳經愧爾師天真泉石秀新  
有鹿門期

王世貞謁黜賢祠杖策尋幽巖叩祠薦清蘋  
木落羣姿盡爛然見天真輕風飄鬚眉蕭蕭若  
有神三字扶靈機萬古意忽新六籍遂糟粕千  
聖歸經綸媚川在懷中含楫問鮫人笑彼愚公  
山老昧襄成津重恐魚目多冥然驕自珍所以



老氏嘆聖作大道湮下學而上達吾意書諸紳  
許應亨別業在江干鴻雁池西湖山庄在林逋  
宅畔浮玉潭寶蓮山又鳳凰山分派三處皆杭  
勝地暇日漫賦 名山處處有微綠暫向明時  
一避喧鴻雁引江流別圃鳳凰分麓到家園越  
王臺畔寒潮急和靖祠前古木繁桑柘在田書  
在篋聊同擊壤答皇恩

包家山 咸淳臨安志在城南近郊壇冷水峪多

桃花為春日遊覽之勝名桃花關關上舊有蒸霞  
二字成化杭州府志今上置山川風雲雷雨壇據  
江山之勝

詩

樓鑰包山 訪客包家山相與登層巔嶙峋巨  
石中屈曲扶闌干夜來雨初過石潭時涓涓輕  
輿列岡頭大江橫吾前亭午潮方盛千艘散平  
川道人第三間花木羅後先竭來舊京塵曠望

為洗煎山斷塔層層西陵渺蒼烟此道走即輶  
歸心更翩翩

董嗣杲包家山 綺霞蒸日透林梢一簇南山  
尚姓包冷水峪邊苔色老冲雲樓下樹陰高園  
鄰古道傳耕籍臺倚青城想拜郊欲趁桃花尋  
隱者闔門無鑰不須馱

胡仲參包山觀桃花 因訪桃花到嶺根御林  
春色此平分千株未數栽唐觀一幅猶堪畫晉

源仙在雲間無處覓人行風外有香聞笙簫隱  
隱宮城隔立盡黃昏更斷魂

張翥清明遊包家山二首 遠近紅千樹絲開

奪艷霞月明寒食雨春老上陽花輦路迷游躅

宮詞入夢華東風葵麥浪回首野人家 太液

曾來鵲高臺舊影娥美人黃土盡故國白雲多

野草荒神籍宮蓮怨擢歌羌兒洗馬處斜日滿

寒波

錢惟善六日遊包山福泉 平生鹿門趣有意  
此誅茅地控江分越山因人姓包海鷗飛落日  
野馬牧荒郊流水花千樹重期載酒有

鳳凰山 咸淳臨安志祥符圖經云錢塘舊治正  
南一十里下瞰大江直望海門山下有鳳凰門有  
雁池山巔石筍林立最為怪竒舊傳錢武肅王鑿  
山見怪石排列兩行如從衛拱立趣向因名排衙  
石及刻詩石上第二峰有白塔塔西有小徑青石

崔嵬夾道皆峭壁中穿一洞人可往來名曰石衙  
好事者多題名其間熙寧中郡守祖無擇對排衙  
石作介亭天風泠然有縹緲憑虛之意山上有聖  
果院側有梵天院江月松風集山頂有兩峰儼如  
髻形目曰鳳凰雙髻西湖遊覽志左薄湖許右掠  
江濱形若飛鳳山下為吳越國治內附後為州治  
天峰在左月巖在右中有石衙南宋建都茲山東  
麓環入禁苑張閤華麗委比蓬赬佳氣扶輿萃於

一脈萬厯錢塘縣志山有嶺曰萬松越城三里而遙雙峰圓秀如鳳翼軒翥十許小翠貫珠下回西南向而成尊形西為御教場四顧坪排衙石奇石十許箇林立相對以名

文

陳隨應行宮記 杭州治舊錢王宮也紹興因以為行宮皇城九里入和寧門左進奏院玉堂右中堂外庫至北宮門循廊左序巨璫幕次列

如魚貫祥曦殿朶殿接脩廊為後殿對以御酒  
庫御藥院慈元殿外庫內侍省內東門司大內  
都巡檢司御厨天章等閣廊回路轉衆班排列  
又轉內藏庫對軍器庫又轉便門垂拱殿五門  
十二架脩六丈廣八丈四尺簷屋三間脩廣各  
丈五朶殿四兩廊各二十間殿門三間內龍墀  
折楹殿後擁舍七間為延和殿右便門通後殿  
左一殿隨時易名明堂郊祀曰端誠策士唱名



曰集英宴對奉使曰崇德武舉及軍班授官曰  
講武東宮在麗正門內南宮門外本宮會議所  
之側入門垂楊夾道間以芙蓉環朱欄二里至  
外宮門節堂後為財帛生料二庫環以宮屬直  
舍轉外窰子入內宮門廊右為贊道春坊直舍  
左講堂七楹扁新益外為講官直舍正殿向明  
左聖堂右祠堂後凝華殿瞻棗堂環以竹左寢  
室右齊安位內人直舍百二十楹左彞齋太子

賜號也接綉香堂便門通繹已堂重簷複屋昔  
楊太后垂簾於此曰慈明殿前射圃竟百步環  
脩廊右博雅樓十二門左轉數十步雕闌花甃  
萬卉中出鞦韆對陽春亭清霄亭前芙蓉後木  
樨玉質亭梅繞之由繹已堂過錦膳廊百八十  
楹直通御前廊外即後苑梅花千樹曰梅岡亭  
曰冰花亭枕小西湖曰水月境界曰澄碧牡丹  
曰伊洛傳芳芍藥曰冠芳山茶曰鶴丹桂曰天

闕清香堂曰本支百世佑聖祠曰慶和泗州曰  
慈濟鍾呂曰得真橘曰洞庭佳味茅齋曰昭儉  
木香曰架雪竹曰賞靜松亭曰天陵偃蓋以日  
本國松木為翠寒堂不施丹雘白如象齒環以  
古松碧琳堂近之一山崔嵬作觀堂為上焚香  
祝天之所理宗時吳知古掌焚修每三茅觀鐘  
鳴觀堂之鐘應之則駕輿山背芙蓉閣風帆沙  
鳥出履舄下山下一溪縈帶通小西湖亭曰清

連怪石夾列獻瑰逞秀三山五湖洞穴深杳豁  
然平朗翬飛翼拱凌虛樓對瑞慶殿損齋緝熙  
宗政殿之東為欽先孝思復古紫宸等殿木圍  
即福寧殿射殿曰選德坤寧殿貴妃昭儀婕妤  
等位宮人直舍螭聚焉又東過閣子庫睿思殿  
儀鸞修內八作翰林諸司是謂東華門

徐一夔吳越國治考 吳越國在杭州鳳凰山  
下其子城南為通越門北曰雙門錢氏納土後

二門猶存臨安志載吳越錢氏造而不言在鳳凰山下宋政和二年孫沔守杭蔡襄為沔撰雙門記內云吳越王依山阜以為治而雙門置木石錮金鐵用為敵備沔以為非禮制改作之則錢氏宮室在鳳凰山下無疑高宗駐驛杭州徙州治於清波門內今州治是也但宋南渡即其地為行都故後人但知有宋故都而不知有錢氏耳初錢氏以强弩射潮築隄捍國而以鐵幢

識其射處以今驗之去鳳凰山僅二百許步此  
足為證錢氏當五季據有兩浙八十餘年亦頗  
有功德於民詢之故老已不知建國之處弔古  
者無從質焉吳越舊有備史今亦不存因修志  
補其闕畧云爾

詩

姚合杭州官舍即事 臨江府署清閒卧復閒  
行苔蘚疎塵色梧桐出雨聲漸除身外事暗作

道家名更喜仙山近庭前葯自生

白居易郡亭 平旦起視事亭午卧掩闕除親  
簿領外多在琴書前况有虛白堂坐見海門山  
潮來一憑檻賓至一開筵終朝對雲水有時聽  
管弦持此聊過日非忙亦非閒山林太寂寞朝  
闕空喧煩惟茲郡閣內囂靜得中間

虞舜卿吳越國治懷古 巾子山前大士來虛  
疑强弩射潮回素車忍犯鴟夷怒錦樹還依仙

姚哉寶剝滿城懸日月大江截地走風雷由來  
霸氣憑天險漫倚金幢鎮劫灰

孫覺介亭真人昔未起奔應駭四方連延天  
目山兩乳百里長有地跨江海無種生侯王中  
宵燎穹旻列石表壇場朱旗大梁野英氣通八  
荒寥寥百年後故物亦已亡所餘彼巉巖峰巒  
屹相望主人承明老星斗主文章築亭紫霄上  
坐客蒼林旁攀雲弄明月曉星出扶桑禹山隔



波濤簡書永埋藏願逢希夸使水土還故鄉

沈溝排銜石 盤嵯絕巘與天通汗漫烟霞謝

世籠聳起浮圖山突兀自然銜石玉青葱古人  
興廢千年上遊客登臨一嘯中誰為燕然愧班  
竇孤城霸據亦銘功

趙抃中和堂 老來重守鳳凰城千里人心豈  
易平樂職古賢形嘆頌中和終不為虛名

趙抃介亭 介亭羣石似飛來深挿雲根兩兩

排占得羣峰最高地翠姿何處有塵靈

蘇軾予前後守倅杭凡五年夏秋之間蒸熱不可過獨中和堂東南頰下瞰海門洞視萬里三伏常蕭然也紹聖五年六月舟行赴嶺外熱甚忽憶此處而作是詩 忠孝王家千柱宮東坡作吏五年中中和堂上東南頰獨有人間萬里風

蘇軾登介亭次劉景文韻 澤國梅雨餘衰年

因蒸漚高堂磨新塼頗覺利腰足松根百尺井  
兩綆飛淨淥流觴聚兒童一咲為捧腹清風信  
可馭剛氣在巖麓始知共此世物外無三伏長  
歌入雲去不待弦管逐西湖真西子烟樹點眉  
目濤江少醞藉高浪翻飛屋俯仰拊四海百世  
飛鳥速遠追錢氏餘近弔祖侯燭吾生如寄耳  
寸晷輕尺玉誰似劉將軍逸韻謝邊幅予言一  
揮手五車不再讀春巖彩鷄舞月峽哀猿哭朝

先鷓鴣起暮與寒螿續我老廢吟哦賴君時擊  
觸從今事遠覽發軔此幽谷清游得三昧至樂  
謝五欲莫作狂道士氣壓劉師服

蘇軾登介亭餞楊傑次公 藍輿西出登山門  
嘉與我友尋仙村丹青明滅風篁嶺環珮空響  
桃花源前朝欲上已蠟屐黑雲白雨如傾盆今  
晨積霧卷千里豈畏觸熱生病根在家頭陀無  
為子久與青山作弟兄孤峯盡處亦何有西湖

鏡天江抹坤臨高揮手謝好住清風萬壑傳其  
言風回響荅君聽取我亦到處隨君軒

錢惟善鳳凰雙髻鳳來天目想東南瓊樹巢  
空百鳥慚千仞翱翔秋綰髻兩髦髮鬢暮樓嵐  
誰嘲風落烏紗帽自惜山為碧玉簪仙女洗頭  
休望嶽相期岸幘對虛談

王逢鳳凰山登宋故宮遺址金爵觚稜月向  
低泠泠清磬萬松西五門曙色閒龍尾十日春

金匱要略卷之七  
寒健馬蹄紅霧不收花氣合淥波初漲柳條齊  
遺民暗憶名都會尚繞湖濬唱大堤

貫雲石休暑鳳凰山 路隔蒼苔卒未通泉花  
如髮玉濛濛蛟浮海近雲牕濕蛟怯山寒葛帳  
空高枕不知秋水開門忽見暮帆東物華萬  
態俱忘我北望惟心一寸紅

王守仁御教場 絕頂秋深荒草平昔人曾此  
駐傾城干戈消盡名空在日夜無窮潮自生谷

口巖雲揚殺氣路邊疎樹列殘兵山僧似與人  
同興相趣攀蘿認舊營

鍾淵映過宋御教場址是累朝觀潮處作尚

憶宸游處嚴城列會同觀濤臨曲水馳道擬回  
中翠蓋朝承露芝旗晚引風言驅七萃士齊試  
六軍雄將帥咸思奮君王自即戎馮夷朝幕府  
羅刹蔽艤艫松下秦王輦雲間夏后宮瑞烟浮  
五色仙樂聽三終白馬來何疾吳兒技最工拔

河傳往事超距倏乘空噴薄凌春雪氤氲接彩  
虹蜃樓從地湧蛟市與天通雜奏魚龍戲仍論  
校獵功湖山方晏會襄漢已交攻苑走胥臺鹿  
人悲朔塞鴻驚沙叱鐵騎高柳掛雕弓潮汐還  
從北江流不向東御隄塵颿颿蹕路草茫茫漁  
父留金鉞征人走玉驄平生懷古意悽惻感飄  
蓬

毛先舒南宋宮詞二首 花接凝華路逶迤東



宮官屬美丰儀春遊博望行聯騎月出西園坐  
賦詩 石筍排衙御教營山頭北眺汴梁城君  
王無日忘神武月朔登操女子兵

月巖 咸淳臨安志鳳凰山之上為月巖有亭曰  
延桂武林梵志聖果寺有通明洞放光石飛龍石  
飛雲洞上天梯觀澈石許僧泉卧醉石歸雲洞躍  
雲石竹塢檀藥齋乘鷺閣諸勝循級而上為月巖  
七修類藁江干鳳凰山有石如片雲拔地數丈有

一竅尺餘名曰月巖惟中秋之月穿竅而出餘月則斜聖果寺志羣玉瓣瓣攢立宛然如削壁鐫題咏漶滅過半如高大光明光影中天本來面目皆蔡襄題石門月巖無影相楊孔思題夕照通明方九思題

詩

趙師恕月巖 瞻此巖壑勝領客共登臨危棧  
臨石側巘途歷巖欽俯仰極高低上下窮幽深

來登空明山千崖正沉沉下瞰青羅江古木鬱  
蕭森清風萬里來層雲盪孤襟有客可共賦有  
酒可自斟此景豈易得此樂豈易尋吾生今老  
矣遁迹歸窮岑一櫂下瀟湘此別意難任別後  
無相忘詩成寄郵音

陳天瑞題月巖 怪石堆雲矗太空女媧煉出  
廣寒宮一輪常滿陰晴見萬古無虧晝夜同搗  
藥聲繁驅白兔漏天孔正透清風光明自照如

來境肯學嫦娥西復東

沈捷月岩 月巖有月竇疑是鬼神鑄高擎石  
之杪空洞徑尺圓日月出沒時光彩皆斜穿獨  
是中秋夜奇景不可箋以月嵌月竇分毫不爽  
焉老僧指示予予初疑浪傳襍被約友人候月  
勝果巔童僕性狂躁數往驚否然直至夜將半  
明月當中天月循竇中入地下玉鏡旋人繇竇  
中視天上合璧懸攜月就心印快覩舊物還太

息山下宿勿復疑山川

吳農祥月岩 月色雲巖好遲回每夜闌光從  
牛斗發影落兔輪寒萬里清輝滿三秋早露溥  
更依危逕立遙入亂峯看蟋蟀吟逾苦蕙葭色  
未乾空汀浮島嶼宿火照江千古殿推金谷殘  
碑陷石壇吾生從夙願同爾問漁竿

臣謹案聶心湯邑志載江上之山以上數山  
而外支派甚多衆山西為焦山觀山白巖山

石龍山茱萸尖石灰嶺黃山之支為栢子尖  
山牛方嶺百丈山焦山之支為馬鞍山黃山  
阪白巖之支為九里暗山眠牛山青山石龍  
之支為解頭山鯉魚山旋井山長山茱萸尖  
之支為瓜藤山神仙石和尚山羅帶山皆屬  
沿江今俱不錄略存梗概於此

吳山 咸淳臨安志在城中吳人祠子胥江上因  
名曰胥山名勝志春秋時為吳南界以別於越故

名吳山西湖遊覽志天目山翔舞而東結局於鳳  
凰山其支山左折遂為吳山奇嶠危峰澄湖靚壑  
江介海門回環拱固扶輿淑麗之氣鍾焉萬厯錢  
塘縣志南山蔭峙女牆亘其上入城蜿蜒二里許  
曰吳山拾級上百武亭亭闌闌中前俯大江回望  
浩淼麓有寒泉諸山東南面江蔓衍相屬欲峙欲  
伏若續若斷屆城而上總曰吳山演繁露潘同祈  
江論云胥山西北舊皆鑿石以為棧道唐景龍四

年沙岨北漲地漸平坦桑麻植焉州司馬李珣始  
開沙河胥山者今吳山也而俗訛為青山其圖經  
云沙河塘在城南五里此時河流去胥山未甚遠  
故李紳詩曰猶瞻伍相青山廟又曰伍相廟前多  
白浪景龍沙漲之後至於錢氏隨沙移岨漸至鐵  
幢今新岸去胥山已逾三里皆為通衢居民甚衆  
此皆圖經之言至宋紹興間紅亭沙漲其沙又遠  
在胥山西南矣神州古史考吳山古臨江至今俗



稱浪網山山下有瀋沙坑洋壩頭今則去江十里  
西湖志吳山大觀臺每當秋濤初壯東望海門汪  
洋澎湃直趨富春然後潮平岸濶風正帆懸一舉  
目間江山如畫西湖志纂大觀臺為吳山最高處  
康熙二十八年

聖祖仁皇帝南巡

御製登吳山絕頂詩

左控長江右控湖萬家烟火接康衢偶來絕頂憑虛望

似向雲霄展畫圖

三十八年

聖祖再幸

御製登吳山詩

重經層巘暫停鑾  
天日晴和覽眺寬  
城市萬家烟火近  
念茲莫遣有饑寒

並恭摹勒石建亭於大觀臺上  
乾隆十六年三月

初二日

皇上省方至浙

臨幸吳山

御製恭依

皇祖吳山詩韻詩

崇獻襟江復帶湖俯臨萬井樂亨衢百年休養

三朝澤繼述予懷凜永圖

又

御製吳山大觀歌

我遊名山亦已多吳山大觀今作歌興安大嶺及長白  
嵩臺麓田盤窩諸山未兼江海勝此間曠覽俱遮羅  
南北高峯走龍脈蜿蜒入郡成嵯峨琳宮梵宇許居下  
不許墻宇盤尖螺平列坎石鎮火患風從其俗無煩訶  
第一峯頭縱遐矚壯哉所見真無加左江右湖互環抱  
海氣翳旬含羲娥維水有四三已具故富魚族蛟鼉鼉  
天吳陽侯時出沒列缺豐隆相盪摩吳顛越躡閱興廢  
宋遼元代紛請訛只賸吳山青不磨吳山大觀今作歌

二十二年

翠華重幸

御製乾隆丁丑仲春南巡再依

皇祖吳山詩韻詩

旱暵重臨明聖湖吳山先此陟雲衢萬家烟火滋繁  
庶足食足衣慎後圖

二十七年

皇上三幸江浙

欽定四庫全書

海塘錄

御製壬午暮春之初三依

皇祖吳山詩韻詩

南眺長江西盼湖城中  
陟巘歷香衢寧因玩景賡

前韻曰在觀民有本圖

又

御製三月朔日登吳山作歌詩

一峯婉婉走郡城  
衆峭攢簇羅大屏  
若有若無尋棧  
升造極廣厦原平陵  
何須勒馬誇豪情  
惟願衆庶恒

安寧西湖下視如急待吾方未暇將觀海

詩

陳允平登吳山 登山一展眺宮樹鬱嵯峨樓閣春風滿東南王氣多青天行日月大地布山河柳色沙堤路時聞響玉珂

施樞至日謁廟吳山見日初出 曦龍浴海出

扶桑雲表輝芒燭萬方史館繽紛書瑞色禁城奕燿鎖祥光從知繡線添紅影獨喜丹心向太

陽節裏官閒無一事諦觀易道靜焚香

方岳修胥山路 兩山壁立束微行石齒參差  
半已傾莫等危時扶使穩但逢險處放教平一  
毫以上諸人力半月之間樂事成安得坦夷三  
萬里家家門外是鵬程

方回次韻夾谷子枯吳山晚眺三首 詩眼書

胸碧宙寬暮天搖落縱遐觀霜明楓葉紅於染  
春點梅梢玉不寒北望遙迎書雁至南京屢饜



膾魚殘一規明月懸江海幾許人家夜枕安

鵲飛欲沒海天寬萬動盈虛靜處觀一畫微陽  
迎日至九疇休範驗時寒世間劫火灰何恨物  
外仙碁局未殘好與蒼生司性命五風十雨報  
平安落木蕭蕭澤國寬偶舒巖嘯縱川觀六  
鰲海濶征帆遠萬象天低步履寒旅泊餘生簞  
食菲宜遊舊味甕齏殘達人不墮牛山淚何待  
將心與汝安

趙孟頫吳山 城上高樓接太霞  
令嚴鐘鼓寂無譁  
提疆內向三千里  
比屋同封百萬家  
心在江湖存魏闕  
身隨牛斗泛仙槎  
舉頭便覺長安近  
時倚闌干望日華

薩都拉錢塘驛樓望吳山 仙居時復與僧鄰  
簾幙人家紫翠分  
後嶺樓臺前嶺接  
上方鐘鼓下方聞  
市聲到海迷紅霧  
花氣漲天成綵雲  
一代繁華如昨日  
御街燈火月紛紛

貢性之咏吳山景  
鸞翔鳳翥枕江流秀奪江

南第一州螺髻巧盤雲外影娥眉深鎖雨中愁  
舞衣春賜鴛鴦錦歌扇晴翻翡翠樓寶馬香車  
遊冶子賞心誰不為遲留

楊載吳山晚眺  
山椒暈構四垂寬上相旌旗  
曾覽觀傍近江湖天廣大上連星斗地清寒龍  
宮永鎖函書閤鳳嶺重嗟苑樹殘此際獨無雲  
蔽日正宜翹首望長安

張輿晚遊吳山次韻 羅綺連雲幾萬家  
黃昏樓店尚紛譁珠簾十里卷明月  
銀燭萬條生紫霞塵帶花香隨去馬  
街連樹色引歸鴉閉門不作華胥夢  
卧聽江聲走白沙

沈謙吳山曉望歌 吳山突兀氣磅礴  
下瞰錢塘水波惡第一峯頭鷄始號  
羣星未落金盤高須臾赤焰射江水  
南北千山忽青紫海門堆雪蛟龍吼  
小兒看潮今白首嗚呼雪浪空崔嵬  
吳

越興亡誰是非

嚴我斯登吳山絕頂放歌

鳳凰嶺畔吳山高

鳳凰嶺下飛江濤江雲片片白如練江風八月

聲怒號有客攀蘿踞峰頂手弄青霞白石冷嵯

峨崇觀連天高俯瞰鱗鱗千萬井中有道士華

陽巾琉璃之盞松花醇拂拭南窓青玉簞殷勤

邀我傾千巡回首西湖西子面翠黛明粧光艷

艷木蘭雙漿嬌晴波桃花玉勒如飛電須臾黑

雲起雷峰吹笙雨脚掛晴空疑是秦王渡海時  
驅山鞭石形離奇又如萬弩射江潮轟車蹴浪  
鼉鼉驕當筵四顧駭心目淋漓急酒杯中綠尊  
前狂客呼李暮橫吹玉笛撼山木笛聲遙遙動  
江濱吹入江天萬里雲忽然雲端起好月銀樓  
玉闕何氤氲不見蘇公已往風流歇處士亭邊  
芳草沒湖山變幻須臾間何必滄桑人代別我  
今不飲胡為乎城頭落月空啼烏

臣謹案吳山隆峙城中去江稍遠然子胥沒  
為濤神胥山之名實由此肇且其山自鳳凰  
左折前臨大江江介海門回環拱固實一郡  
勝概也故錄之

艮山 西湖勝蹟記自龍山沿江而東環沙河而  
包括露骨於茅山艮山皆其護沙也

詩

厲鶚五月二十五日艮山門外晚眺 吳天入

時涼似水袂衣出城三四里城角遶山青半環  
分得濃嵐落漁市荒陂繚繞行何求雲影水中  
凝不收蓬科誰與作都祭陰森大樹堪蔽牛幾  
家叢薄徑微窄稚髭闔籬窺過客梭櫚散葉覆  
深井薜荔牽絲護欹壁喜聞田水夜初滿不道  
瓠花朝更坼半虹忽墮橫一橋恰當高處風刁  
騷四天萬綠染未銷峯尖黃鶴如可招畫本髣  
髴臨山樵深林絕磴巖過雨山中茅屋愁漂搖



道旁日暮紛惆悵白荷欲語嬌相向斜倚珠盤  
踏寒浪菰蒲低處見船行弭櫂無人能一訪我  
時小極因廢書消憂起病兩有餘但思臨平考  
古蹟安得湯鎮謀村居

朝廷蠲租

詔寬大官府勸農意樂胥攜弩亦可號蠶室息影頗  
愛開蝸廬試歌元豐歲連稔姓氏何必聞鄉閭

海塘錄卷七